

Naturvernforbundet Nordhordland
Hoplandssjøen 74
5943 Austrheim

4. juli 2019

Meland kommune
Postboks 79
5906 Frekhaug

Innspel til temarevisjon av kommuneplanen sin arealdel: Areal for havbruk

I Naturvernforbundet Nordhordland sitt arbeidsprogram, vedteke på årsmøtet i 2019, heiter det: «Arbeida målretta for redusert volum i fiskeoppdrettsnæringa i Nordhordland».

Bakgrunnen for vedtaket er høge registreringar av lakselus, sterkt forureina fjordsystem og den høge bruken av avlusingsmiddel som fører til skade på skaldyr. Verst råka er fjordsystema i Nordhordland, i sær Sør fjorden, Osterfjorden og Masfjorden, men òg fjordane rundt Holsnøy, m.a. Radfjorden. Som terskelfjord er Herdlefjorden særleg utsett for forureining. Fjordane rundt Holsnøy er dessutan viktige vandringskorridorar for vossalaksen og bør difor i høgst mogleg grad holdast fri for lakselus.

I temarevisjonen vert to område i Herdlefjorden vurdert som «gode» for havbruk; utanfor Dalemarka og nordvestover frå Fløksand. Naturvernforbundet Nordhordland er usamd i denne konklusjonen og vil be Meland kommunen trekkja områda ut av temarevisjonen. I tillegg til utfordringane knytt til lakselus og forureining i eit relativt lukka fjordsystem, legg Naturvernforbundet vekt på at Herdlefjorden er mykje brukt til båtutfart og fiske og at det i Dalemarka ligg bustadområde tett inn til havbruksområdet som av kommunen er kartlagt som «godt». På landsida utover frå Dalemarka er det turstiar, og det er gjort registrering av hekkande falk i bergveggen mot sjøen. I sum har dei to kartlagte havbruksområda i Herdlefjorden stort konfliktpotensiale. Då må ikkje minst føre var-prinsippet gjelda.

I Radfjorden er det registrert eit stort område som kommunen meiner «kanskje» kan vera aktuelt for havbruk. Som Herdlefjorden, er Radfjorden ein terskelfjord som ikkje tålar mykje forureining. Fjorden er allereie sterkt forureina av kopar. Dessutan er Radfjorden, som Herdlefjorden, vandringskorridor for vossalaksen og difor særleg viktig å halda mest mogleg fri for lus. Naturvernforbundet Nordhordland vil difor be om at også dette området vert trekt ut av temarevisjonen. Det same gjeld området utanfor Flatøy.

Like før jonsok fekk Nordhordland som det einaste i Noreg status som biosfæreområde under UNESCO. Vilkår er berekraftig utvikling. Det forpliktar.

Jan Nordø
leiar
Naturvernforbundet Nordhordland